

## 每週經課朗誦經文(巴克禮台語漢字)2012/07/15

### 共同經課 - 1

#### 撒母耳記下六章一節~五節，十二b節~十九節

1 大衛閣聚集以色列中所揀的三萬人。2 大衛起身，導隨伊的眾百姓，對巴拉猶大去欲對遐扛上帝的櫃來；此個櫃的名是用坐佇二個基路兵的中間萬軍的耶和華的名來稱者。3 in 下上帝的櫃佇新的車，對山頂亞比拿達的家載出來；亞比拿達二個子烏撒及亞希約趕彼個新車。4 in 將伊及上帝的約櫃對山頂亞比拿達的家載出來，亞希約行佇櫃的頭前。5 大衛及以色列的全家佇耶和華的面前，用松柴所造逐號的樂器及琴、瑟、鈴瓏鼓、大鼓、鈸，來作樂跳舞。12b 大衛就去，歡喜扛上帝的櫃對俄別以東的厝到大衛的城。13 扛耶和華約櫃的人行六步，大衛就獻一隻牛及一隻肥的精牲做祭祀。14 大衛佇耶和華的面前盡力跳舞，大衛結幼苧布的以弗得。15 按呢，大衛及以色列全家扛耶和華的櫃上來，出歡喜的聲歡哨角。16 耶和華的櫃入大衛城的時，掃羅的查某子米甲對窗仔門看，看見大衛叫起來跳舞佇耶和華的面前，心就看輕伊。17 in 扛耶和華的櫃入去，下佇伊的所在，就是大衛所為伊搭的布棚。大衛佇耶和華的面前獻燒祭及謝恩祭。18 大衛獻燒祭及謝恩祭明白，就用萬軍耶和華的名給百姓祝福，19 閣佇許個眾百姓，就是以色列眾人，無論男女，每人分互 in 一個餅，一塊肉，一個葡萄干餅；眾百姓就去，逐人倒去 in 的厝。

### 共同經課 - 2

#### 詩篇二十四篇

1 [大衛的詩] 地及其中所充滿的，世界及踮佇伊中間的，攏屬耶和華。2 伊將地建立佇海的頂面，安置佇大水的頂面。3 是誰會上耶和華的山？是誰會倚佇伊聖的所在？4 就是手清氣心清潔、存心無向虛假、咒誓無因奸詭的人。5 此號人欲得著耶和華賜福，閣對救伊的上帝得著義。6 諸個是尋耶和華的族類，雅各的上帝啊，這是愛見你的面的人。(細拉) 7 城門啊，抬起恁的頭！永遠的門啊，恁著受舉起！榮光的王欲入！8 彼個榮光的王是是誰？就是大氣力大權能的耶和華，佇交戰有大權能的耶和華！9 城門啊，抬起恁的頭！永遠的門啊，恁亦著抬起！榮光的王欲入！10 彼個榮光的王是是誰？萬軍的耶和華，伊是榮光的王！（細拉）。

### 共同經課 - 3

#### 以弗所書一章三節~十四節

3 願咱的主耶穌基督的上帝也是伊的父得著謳嘍！伊佇基督曾賞賜咱佇天裡逐項屬佇神的福氣：4 就是照伊創造世間的代先，佇基督揀咱，互咱佇伊的面前成做聖，無通嫌；5 伊照伊的旨意所歡喜的，用仁愛代先定著咱對耶穌基督得著做子來歸佇伊，6 互伊恩典的榮光得著謳嘍；此個恩典就是伊佇所疼的子賞賜咱的。7 惦佇伊咱對伊的血得著贖回，赦免罪過，照伊恩典的富有。8 伊將此個恩典用逐樣的智慧及見識，賞賜咱到滿滿；9 已經互咱知伊旨意的奧妙，照伊的好意，10 就是伊佇本身所代先定著的，欲佇諸個日期圓滿的時，設法互萬物不論佇天裡的、佇地裡的，攏佇基督來合一。11 惦佇伊咱也成成家業；就是代先受定著的，照彼個趁家己的旨意、行萬項有者的意思，12 欲互伊的榮光對阮代先向望佇基督的人得著謳嘍。13 惦佇伊恁也已經聽見真理的道，救恁的福音，既然信，就惦佇伊有受所應允的聖神蓋印。14 伊就是做咱承接業的準當，到上帝所得著的業贖回，互伊的榮光得著謳嘍。

### 共同經課 - 4

#### 馬可福音六章十四節~二十九節

14 希律王聽見，因為耶穌的名聲已經出，就講：「行洗禮的約翰對死人中復活，所以有諸個權能對伊顯出。」15 若是有別人講：「是以利亞。」閣有人講：「是先知，親像先知中的一個。」16 總是希律聽見就講：「我所劊頭的約翰，已經復活。」17 因為希律家己曾差人掠約翰，縛伊佇監裡，是為著希律的兄弟腓力的某希羅底的緣故，因為希律有娶伊。18 是約翰曾給希律講：「你娶兄弟的某是不該。」19 希羅底就怨恨約翰，愛劊伊，也袂得著；20 因為希律知約翰的做人義，閣聖，所以驚畏，來保護伊，聽伊的話，就大大躊躇，也歡喜聽伊。21 當著好機會的日，就是希律佇生日，辦桌，請許個大官、千總，及加利利尊貴的人。22 希羅底親生的查某子入去跳舞，互希律及同桌的人攏歡喜。王就給查某囡仔講：「見若你所愛的求我，我欲互你；」23 閣及伊咒誓講：「見若你所求我的，雖然我國的一半，我也欲互你。」24 查某囡仔出去給伊的老母講：「我欲求甚麼？」應講：「行洗禮約翰的頭殼。」25 查某囡仔連鞭走入去見王，求講：「我愛你將行洗禮約翰的頭殼貯佇盤裡即時互我。」26 王就大憂悶；總是為著伊所咒的誓，閣有同桌的人佇喲，所以毋愛推辭，27 王即時差一個侍衛，吩咐取伊的頭殼來。28 伊就去監裡，劊伊的頭，貯伊的頭殼佇盤裡，捧來互查某囡仔，查某囡仔就互伊的老母。29 約翰的學生聽見，就來收伊的身屍，埋葬佇墓裡。